

Dithero tsa Tirelano mo Kutlwanong

30/2015 Thero ka moletlo wa go gopola go tshelwa ga Mowa o o Boitshepo ka pentekoste, e le ka 24. 05. 2015

Mo leineng la Modimo o e leng Rara le Morwa le Mowa o o Boitshepo!

Lefoko le le okamelang beke eno, le kwadilwe mo go Sag. 4:6, le re: **"Ga se ka bonatla, le e seng ka thata, mme ke ka Mowa wa me, go bua MORENA wa Masomosomo."**

1. Sefela sa 147 - 130/143
2. **Thapelo:** Morena, Modimo, Mong-wa-thata-yotlhe, re fa pele ga sefatlhego sa gago go utlwa Lefoko la gago. Morena, re a leboga, ka o re neile Mowa o o Boitshepo gore o fologele le mo go rona, re nne phuthego ya gago. Morena, re a kopa gore Mowa o o Boitshepo o nne mo go rona, o re rute, le go re gopotsa ka tsotlhe tse Morwao Jesu Keresete a di buileng, gore ka Mowa o o Boitshepo re go rate, re boloke Lefoko la gago. Morena, a kagiso ya gago e nne mo go rona, jaanong le ka bosakhutleng ka ene Jesu Keresete. Amen.
3. Lefoko la Testamente e kgologolo le kwadilwe mo go Joele 3:1-5;

Epistolo ka fa thulaganyong ya 2 e kwadilwe mo Ditirong tsa baapostolo 2:1-18;

Efangele ka fa thulaganyong ya 3 e kwadilwe mo go Johane 16:5-15.
4. A go ipolelwe tumelo ya bokeresete!
5. Sefela sa 148 - 131/144
6. Thapelo ya mmadi wa thero.
7. **Efangele** ka fa thulaganyong ya 1 e kwadilwe mo go Johane 14:23-27, e re: "Jesu a mo araba a re: 'Fa mongwe a nthata, o tla tlhokomela lefoko la me, le Rre o tla mo rata; mme re tla tla go ene, re aga mo go ene. Yo o sa nthateng ga a tlhokomele mafoko a me; mme kana lefoko le lo le utlwang ga se la me; ke la ga Rara yo o nthomileng. Dilo tse ke di buile le lona, ke sa ntse ke nna le lona. Mme Mogomotsi, e bong Mowa o o Boitshepo, o Rara o tla o romelang mo leineng la me, o tla lo ruta dilo tsotlhe, o bo o lo gakolola tsotlhe tse ke di lo

boleletseng. Ke lo tlogelela kagiso, ke lo naya kagiso ya me. Ga ke lo nee jaaka lefatshe le naya. A dipelo tsa lona di se huduege, le gona di se boife." Amen.

8. Thero: Phuthego e e rategang ya Morena wa rona Jesu Keresete, a bopelotlhomogi, bopelonomi, le kagiso tse di tswang mo go yo o leng teng, yo o neng a le teng, yo o tlang di nne le lona! Amen. Ke tlwaelo gore banna ba kgalemelwe ke bahumagadi ba bone ka ntlha ya go lebala malatsi a dinyaga a go gopola lenyalo, gongwe letsatsi la botsalo, gongwe letsatsi le le tlhomilweng go ya mo ngakeng ya meno. Go na le ba ba kgalemelwang ka ntlha ya mabaka. Go a diragala gore re lebale tse di tshwanetseng go gopodiwa tota. Go a diragala gore Balutere ba nyadiwe ke bangwe, fa ba lebala go bua ka ga Mowa o o Boitshepo, ba re: Ba bua thata ka ga go balelwa tshiamo ya ga Keresete ka bopelotlhomogi ka go dumela mo go Keresete, ba re: Ba bua thata ka ga Artikele ya 4 ya Boipolelo jwa kwa Augsburg, ba re: Balutere ba itse tsotlhe tsa Modimo Rara, le go bua thata ka ga Jesu, mme ba didimetse, ga ba bue ka ga Mowa o o Boitshepo. A ke nnete? A Balutere ba lebetse Mowa o o Boitshepo? A ba nyadiwa jalo ka tshwanelo? Ke re: Ba nyadiwa jalo fela ke ba ba sa gopoleng tlhaloso ya Artikele ya boraro ya tumelo ya bokeresete, ke bone fela ba ba sa tsholeng ba tsena kereke ka moletlo wa go gopola kgoromeletso ya Mowa o o Boitshepo.

Ke itumelela moletlo wa Pentekoste. O a bidiwa, fa e le wa Pentekoste, gonne leina leo le re: La bomasome a le matlhano, gonne ga diragala ka letsatsi la bomasome a le matlhano morago ga tsogo ya Morena Jesu Keresete mo losong, dibeke tse di supang go tloga foo. Mo moletlong ono go buisiwa mo tirelong-Modimo Dit. 2 mafoko a a reng: "Ga utlwala ka tshoganyetso mosumo o o tswang legodimong, e kete wa ledimo le le tsubutlang, wa tlala ka ntlo yotlhe e ba nnang mo go yona. Ga ba ga bonala mo go bone diteme tse di kgaoganang, e kete dikgabo tsa molelo, tsa nna mo go mongwe le mongwe wa bone. Mme botlhe ba tlala Mowa o o Boitshepo, ba simolola go bua ka diteme di sele tsa batho ba mafatshe a a mantsinyana ka fa Mowa o o buisang ka teng. Botlhe ba feretlhega, ka mongwe le mongwe a utlwa ba bua ka puo ya ga gabo. Botlhe ba tseana, ba gakgamala, ba raana ba re; 'Kana ba ba buang ba, a ga se Bagalelea botlhe? Mme go ntse jang, fa mongwe le mongwe wa rona a utlwa ba bua mo puong ya gagwe e a tsaletsweng mo go yona?"

Ke fa Peto a ema le ba ba 11, a tsholetsa lentswe, a bolelela batho gore ba se ka ba gakgamala fela, mme ba itse gore ka se se diragatseng ka tshologo ya Mowa o o Boitshepo mo go bone ga diragadiwa se se setseng se kwadilwe ke moporofeti Joele mo Testamenteng e kgologolo, gape Peto a bua ka thanolo e kgolo ka botshelo, loso, tsogo le tihatlogo ya ga

Keresete, fa e le ene yo o romileng Mowa ka fa tsholofetsong ya gagwe. Petoro o ne a ba kaela gore ba tlabologe, ba kolobediwe mo leineng la ga Keresete. Ga kolobediwa o ka re ba ba dikete tse tharo.

Go na le ba ba tthalosang se se diragetseng ka letsatsi lele ka gore ke yona tsela e Modimo Mowa o o Boitshepo o itshenolang ka yona, le go dira jalo, ba re: Go a batlega gore Mowa o o Boitshepo o tshwanetse go tla jalo ka ledimo, ba re: Ka metlha o tshwanetse go naya batho go bua ka diteme tse di sa tthaloganngweng, bangwe ba gopole gore ba tagilwe, gore go diragale jaaka ka moletlo ole se se kwadilweng gore "Ba bangwe ba sotla ba re: 'Ba kgotse weine e e botshe.'" Ba re: Tseo ke selekanyo se se supang gore ba amogetse Mowa tota, ba ikutlwe ka nosi gore ba tsenwa ke Mowa.

Ke ka ntlha ya gore Balutere ba gopola tse di solofeditsweng ke Morena wa rona Jesu Keresete ka go solofetsa barutwa ba gagwe Mowa o o Boitshepo ka mafoko a a kwadilweng mo Efangeleng ya ga Johane. Koo go bonala se sengwe, Jesu a re: Rraagwe o tla roma Mowa o o Boitshepo mo leineng la gagwe, a re: Mowa o o Boitshepo, Mogomotsi. 'o tla lo ruta dilo tsotlhe, o bo o lo gakolola tsotlhe tse ke di lo boleletseng." Sa ntlha se re tshwanetseng go se gopola ka metlha ke se: "Mowa o o Boitshepo ga o ithere." Persona ya boraro jwa Borarobongwe o tla mo go rona mo leineng la ga Keresete. O dira e le Morongwa le Moemedi wa ga Keresete. O bidiwa ka leina le lentle, le le reng: Ke Mowa wa ga Keresete. O tshegetsatsi tiro ya ga Keresete, o dira tiro ya gagwe. Mowa o o Boitshepo o rera Keresete yo e leng ene yo o kileng a bapolelwa mo sefapaanong. Maikaelelo a tiro ya Mowa o o Boitshepo ke go galaletsa Keresete, ga se tiro ya ona go tagisa batho gore ba bue tse di sa utlwiweng sentle, tse di sa tthaloganngweng ke motho yo o itseng puo e e tlwaelegile ya mmui, le e seng go tlhotlheletsa motho go ikutlwela tse di gakgamatsang.

Ditshupo tsa moletlo wa Pentekoste di bonagetse ka tse di tshikintseng ba ba di bonang, mme thero ya ga Petoro e re lemosa sentle gore tsotlhe tse di diragetseng ka letsatsi lele di diragetse gore baaposotlo ba bone phatlha go rera ditiro tse di kgolo tsa Modimo gore ba rere Keresete yo o kileng a bapolelwa mo sefapaanong, le go tsosiwa mo baswing ka letsatsi la boraro, batho ba lalediwe gore ba ineele mo tumelong le mo kolobetsong, ba dumele boitshwarelo jwa maleo a bone mo leineng la ga Keresete. Ke ona maikaelelo a moletlo wa kgoromeletso ya Mowa o o Boitshepo, batho ba rerelwe Keresete ka dipuo tse ba goletseng mo go tsona tse ba di tthaloganyang, go dirafadiwe ditsholofetso tsa Lefoko la Testamente e kgologolo, batho ba itsisiwe tsela ya go tthabologa le go kolobediwa. Ga diragala ka Lefoko la

ga Keresete gore Mowa o o Boitshepo o ame dipelo tsa ba ba dikete tse tharo, le go ba tlhabolola ka letsatsi leo.

Maikaelelo a batho ba le bantsi ka go bona le go utlwa ka ga tse dintšhwa tse di gakgamatsang. Ba lapa ka pele ka tse di tlwaelegileng fela, tse di diragetseng ka malatsi otlhe, ba solofela gore go dirwe sengwe se se amang maikutlo, se se tshikinyang dipounama le mebele ya bona, se se kaiwang kgakgamatso. Ba rata go bofiwa ka tse dintšhwa tse di phatsiamng, ba bua ka dipuo tse di sa tlwaelegileng, tse di sa tlhaloganngweng, ba lebala ka pele se e leng sona sa nnete tota.

Ka tsholofetso ya gagwe ya thomo ya Mowa wa gagwe Jesu o bua ka ga se e leng sona sa nnete sa thomo ya ona, ke go kopanngwa le Rara gore a kopanngwe le batho ba gagwe. Lefoko la thero ya kajeno le re: "Jesu a mo araba a re: 'Fa mongwe a nthata, o tla tlhokomela lefoko la me, le Rre o tla mo rata; mme re tla tla go ene, re aga mo go ene. Yo o sa nthateng ga a tlhokomele mafoko a me; mme kana lefoko le lo le utlwang ga se la me; ke la ga Rara yo o nthomileng. Dilo tse ke di buile le lona, ke sa ntse ke nna le lona. Mme Mogomotsi, e bong Mowa o o Boitshepo, o Rara o tla o romelang mo leineng la me, o tla lo ruta dilo tsotlhe, o bo **o lo gakolola tsotlhe tse ke di lo boleletseng.**'" Tse di tshwayiwang ke Keresete, tse a di gatelelang ke lorato lwa ga Rraagwe lo lo re senolelang gore Modimo o tla mo go rona, o rata go nna le rona, go nna mo go rona. Se Jesu a se gatelelang ke kopano ya go rata Keresete, le go reetsa, le go utlwa thuto ya gagwe, a re: "Fa mongwe a nthata, o tla tlhokomela lefoko la me, le Rre o tla mo rata; mme re tla tla go ene, re aga mo go ene. Yo o sa nthateng ga a tlhokomele mafoko a me."

Ga a bue a re: Ka gongwe o tla a tlhokomela, a re: "Fa mongwe a nthata, o tla tlhokomela mafoko a me." Go tlhokomela mafoko a gagwe ke go mo itse, le go utlwa Lefoko la gagwe. Go tlhokomela lefoko la gagwe ke go itumelela pholoso e re e baakanyeditsweng ke Keresete ka botshelo le loso lwa gagwe. Re baakanyeditse pholoso ka ntlha ya bopelotlhomogi, ke go nna le Modimo, go amogela thata ya ona ka go atamela mo selalelong sa ga Keresete, le go tsena kereke mmogo le phuthego, le go tshegetsang tiro ya baruti ka dikabelo, le ka go nna basupi ba ga Keresete fa pele ga batho. Pholoso e e mo go Keresete ke go nna mo Modimong, go tshela le ona, le go tshela ka ona. Jesu a re: "Yo o nthatang o tla tlhokomela lefoko la me." Ke puo ya bopelonomi jwa Modimo e e re tshegetsang, le fa re ka palelwa gantsi ka go tlola lefoko la ona, lefoko la ga Keresete le tla re tlhomamisetse mo tumelong go ikanya ditsholofetso tsa gagwe.

Go diragala fela gore re rate gore tiro ya Mowa o o Boitshepo e bonale mo matlhong, mme tse di bonalang mo matlhong, gongwe tse di utlwalang ka dipuo tse di sa tlhaloganngweng mo ditsebeng ke phapogo, fa di tlotliwa ka go feta tekano, gongwe ka go tshwayiwa, fa e le tse di tshwanetseng go diragala. Tse di bonalang o ka re: Ke dikgakgamatso mo matlhong a batho ga se ditshupo tse di tlhokegang go supa gore Mowa o o Boitshepo o dira mo go rona. Se se tlhokegang tota ke bopaki jwa Mowa o o Boitshepo ka ga Keresete, le mafoko a ga Keresete.

Mowa o o Boitshepo o dira kwa lefoko la Modimo le rutiwang, le go dirisiwa teng, kwa disakaramente di abelwang teng ka fa lefokong la Modimo le le rutiwang ka boammaaruri ka bophepa, o a dira gore batho ba lemoge tiro ya bone ka tumelo e sa bonatshege mo matlhong, go ka diragala ka nako nngwe fa tiro ya ona e bonwa ka matlho, mme ga go diragale gantsi. Le foo go ka dirafala gore Satane a tsietse batho ka diponatshego tse di ntseng jalo. Ga re a fiwa selekanyo go lekanya tseo ka tlhomamo. Tse di tlhomameng ke kutlo ya lefoko la nnete le go bona kabelo ya kolobetso le selalelo sa ga Keresete. Tse di biditsweng ke Modimo di phatsima ka lesedi la ona, gonne Jesu a re: Mowa o o Boitshepo o tla dira kwa lefoko la Modimo le rerwang, le go rutiwa teng ka bophepa. Mowa o o Boitshepo o dira kwa disakaramente, kolobetso le selalelo sa Morena di abelwang, le go amogelwa teng ka fa tlhomamisong ya tsona, ka fa Efangeleng ya ga Jesu Keresete. Ka ditsisa-bopelotlhomogi tseo Mowa o o Boitshepo o tlhagisa go hutsafalela maleo, go tlabologa, le go dumela ka go abelwa boitshwarelo jwa Modimo. A re se ka ra lebala boammaaruri joo!

E rile Alexander Solshenitsyn a abelwa "Nobel Peace Prize" o ne a bodiwa gore ga diragala jang gore pheretlhego ya kwa Russia ya ngwaga 1917 ya godisa bokomonisi mo go kalo mo lefatsheng la teng, ene o ne a araba a re: Morafe wa bone o ne wa lebala Modimo. Masetlapelo a a maswe a kanakang a diragala kwa morafe o lebalang Modimo teng. Ditiragalo tsa nako e e fetileng di a re gopotsa gore tse di ntseng jalo di diragala ka pele, gantsi fela. A re se ka ra lebala Modimo! Re o batle kwa o bonwang teng, re o batle mo mafelong a a tshwayilweng ke ona gore o bonwa teng, e bong mo lefokong le mo disakaramenteng tse di abelwang ka fa Efangeleng. Teng Mowa o o Boitshepo o dira teng ka go re senolela lorato lwa Modimo lo lo mo go Jesu Keresete. Amen

9. Thapelo: Morena, Modimo Rara yo o mo legodimong, re lebogela ditsholofetso tsa lorato lo logolo lwa gago tse o di re diretseng ka go re senolela loso le tsogo ya ga Morwao, le ka go

re romela Mowa o o Boitshepo go aga kereke ya gago mo lefatsheng ka thero ya Efangele le ka kabelo ya disakaramente le go re itshwarela maleo ka ntlha ya ga Jesu Keresete. Amen.

Thapelo ya Morena: Rara wa rona yo o mo legodimong ...

10. Sefela sa 152 - 135/136

A kagiso ya Modimo e e fetang tlhaloganyo yotlhe e boloke dipelo tsa rona le maikutlo a rona mo go Keresete Jesu, Morena, Morepholosi. Amen.

Thero eno e kwadilwe ke K. Böhmer, ka ngwaga wa 2015

Kgatiso le go rongwa ga dithero tseo go tshegediwa ke kopano e e bidiwang The Lutheran Heritage Foundation.